



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las seguaintas fatschendas:

Politica da seguondas abitaziuns

Il Chantun dvainta activ illa politica da seguondas abitaziuns. El ha elavurà ün plan directiv cun "chaista d'üsaglias" chi pussibiltescha als cumüns da frenar svilups na giavüschats (impustüt massa blers "lets fraids"). Il cumün da Scuol ha pudü tour posiziun in üna procedura anticipada da consultaziun. In quista pusiziun esa gnü intunà cha Scuol s'occupa fingià plü lönch cun quista tematica, p.ex. cun progets per promover abitaziuns e terrain da fabrica per indigens e culla quota da prümas abitaziuns (25 %), cun pussibilità da's cumprar liber in pajond üna taxa da schlubgiamaint. Quista taxa (chi pudess eir gnir augmantada) es previssa per la promoziun da prümas abitaziuns e da l'hotellaria tradiziunala. Excepziuns stessan però esser pussiblas eir in avegnir, p.ex. chi's po excluder las restricziuns per progets cumplexsivis ingio chi vain finanziada la fabrica o la renovaziun d'ün hotel tras la vendita da seguondas abitaziuns.

Scumpart dals cuosts per la classa pitschna

Ils cumüns da Tarasp, Sent e Ftan nu d'eiran plü tant cuntaints culla clav da scumpart pels cuosts da la classa pitschna integrada. Il manader da scoula ha fat per incumbenza dal cussagl da scoula divers sclerimaints e plüssas calculaziuns. La proposta da scumpartir ils cuosts in basa da 50 % tenor abitants e 50 % tenor lecziuns vain approvada dal cussagl cumünal.

Pulizia cumünala e chantunala

Divers cumüns in Grischun han fingià surdat las incumbenzas da la pulizia cumünala a la pulizia chantunala. Eir a Scuol esa previs da far quist pass. Il cussagl cumünal ha discus l'offerta da la pulizia chantunala e decis da tilla acceptar in princip, eir scha quist pass chaschuna bainquant daplü cuosts al cumün. I sun da sclerir però amo divers detagls i'l decuors dals prosemms mais.

Sarinera S-charl

Als 20 schner 2009 ha gnü lö ün inscunter d'infuormaziun e da discussiun culs proprietaris da stabilimaints illa fracziun da S-charl. Il tema principal es stat il lö da la sarinera. Il lö sur la deponia veglia ha chattà la plü gronda acceptanza. Displaschaivelmaing nu vain quel in dumonda per la cumischiun da privel e per l'ANU (Uffizi chantunal per natüra ed ambiaint). Tenor els esa da perseguitar la varianta Praditsch. Il cussagl decida da tour per mans il plü svelt pussibel üna revisiun parziala da la planisaziun. La zona pella sarinera dess gnir definida i'ls plans uschè chi füss pussibel da realisar la sarinera i'ls lös 2 e 3 tenor discussiun da variantas. Da prümavaira cur chi's po ir a masürar precis las otezzas dal lö as spera eir d'avair las pusiziuns definitivas dals uffizis.

Surdattas da lavur

Il cussagl cumünal ha decis differentas incumbenzas d'indschegners ed architects per planisar las investiziuns premissas tenor preventiv d'investiziuns.

Dumondas da fabrica

Il cussagl resp. la direcziun han dat ils seguaints permiss da fabrica:

- al Touring Club Suisse per ün nouv stabilimaint d'infrastructura pella piazza da campar in Gurlaina
- a Reto Stocker per üna chasa d'abitar in Prà da Bügl
- als iertavels Cla Vital per müdamaints interns da la chasa nr. 313, Vi
- a Christian Caviezel per ün implant fotovoltaic sül tet da sia chasa in Rablüzza
- a Chasper Fried jun. e Michael Soland per üna chamonna per spettar la vuolp sper la punt Val Lischana sü San Jon ost
- a la Confederaziun (corp da guardgias da cunfin CGC) per ün alber cun antennas ed ün stabilimaint suotterran (pels indrizs da comunicaziun) sper il magazin da muniziun sü Motta Naluns. L'Uffizi chantunal pel svilup dal territori sto amo dar l'acconsentimaint, siond chi's tratta d'ün fabricat dadour la zona da fabrica.